

El dernière dè Zante.

## **El djoû des incombrants.**

Zante a yeu l'occasion d'lire el dernî papî què du vo z'ai invouyî (rapp'lèz-vous:El grippe à viers) èyè I n'est nî pu binaise què ça:I paraît què du dèforme ses paroles èyè què du l'fais passer pou pu biesse qu'I n'est.Donc,èç'coûp-çi d'ai dècidé dè li d'nér la parole:I n'a qu'à spliquî s'n'affère li-min-me.

Françwès.

Ascoutèz bîn ç'què d'va çï vo racontér.

Après-d'main,ç'est les incombrants donc du va couminchî à rammonch'lér les ranchèneries qui trâin'té dins l'ermise.

I n'pass'té foque pu qu'deux coûps par an mèt'nant.C'est vrai qu'il a des containers pou l'zes poûrtér au fur è à m'sure.In pusse,I n'a pu grand chouse à quertchî pusquè les « vautours » ont tourné tout l'nût pou récupèrer les twois quarts dè ç'què vo z'avèz mis.D'ailleurs,du m'demande bîn ç'qu'il fait'té avû ça par après!

A propos des incombrants,du vas çï vo racontér l' farce qui a arrivé à Julot l'facteur,il a n'vingtaine d'années dè d'ci.

Julot (qui est pinsionné despûs) f'soût l'tournée du bas d'Houdé èyè comme tous les factèurs,il avoût ses capelles,notammint au Ravin Mad'Ion èyè à l'rue du Vint d'bise.

Cî l'djoû des incombrants èyè v'là donc no Julot qui arrive à yeune dè ses capelles-du n'sais pu l'quéle-dèssus s' bicyclette dè service.

Avant d'rintrér boire es'pètitte goutte,il astoque es'n'ostil d'travail cont' el'mur, juste à costè d'in moncha d'soûrs à imbarquî.

Hé-là,gaillard:Pindant ç'timps-la,I d'a yun qu'est passé èyè qui a dit in li-min-me:"Faut djà yesse bîn bruchaudeux pou r'wér ène bicyclette in bon ètat ainsi!" Comme es'n'homme-la avoût djà ène bicyclette,ça n'l'intèressoût nî intièrre mais avoût ène paire dè roues d'rèserve,ça wouyèe.Il a donc desvissé les papillons èyè il est parti avû les deux roues pad'sous s'bras.

Quand no Julot est dèvudî dè l'maison,il a yeu l'émotion dè s'vie:es'bicyclette à terre èyè sans ses roues!

Il a couminchî à cryî comme in scoûrçi,assez pou rattirér tous les vijins.

Quand I d'a yun qui li a dit:"Du vîn d'vire el pètit Bert passer avû deux roues d'bicyclette.",Il a coureu comme in desraté pou l'rattaper deux rues pu long avû el'ferme intention dè l'maksaudér si il l'avoût à belle èyè si I n'î nî in gaillard dè cint kilos avû des mains comme des scoupes.

El pètit Bert in question astoût foûrt imbété ;il a bîn spliquî qu'l pinsoût què c'î pou les incombrants èyè qu'l n'avoût nî l'intention d'mau fai.Bref ça s'a arrindjî èyè Julot est r'vènu avû ses deux roues à d'bout d'bras.

MAIS, intrètimp, el camion î passé èyè, viyant trin-nér ène bicyclette sins roues, l n'ont nî fait ni yeune ni deux pou l'imbarquî avû l'restant des piffots. Donc, mèt'nant, Julot avoût ses deux roues mais l n'avoût pu l'câd'!

Heureus'mint, à ç'moumint-la, c'î l'camion dè l'commune qui passôût èyè ç'nî nî co yun avû in broyeur, donc Julot n'a yeu qu'à dallér dusqu'au service travaux pou récupérer el'câd èyè tout r'montér. In rattindant, ça li a quant-min-me fait deux bons kilomèt's à pîds avû ses roues à s'main èyè s'sacoche su s'dos!

Viyèz bîn qu'il faut toudi yesse prudent pasqué quèqu'fois, sans l'vouloir, on est bîn imbété èyè on imbéte les aut's. D'ailleurs, em'vijin Françwès (el çî qui dèforme mes histwoires), l n'a nî intèrèt à s'indoûrmi su s'dèvanture quand l' camion passe!

Zante

Rammonch'lér = rassembler/les ranchèneries = « le brol »/quertchî = charger capelle = chapelle, arrê/astoquî = appuyer/soûrs = « brol »/bruchaudeux = gaspilleur/dèvudî = sortir/scoûrçi = écorché/maksaudér = tabasser/avoû à belle = avoir à portée/piffots = (litt) bibelots/dèvanture = façade.

